

DIPPELETŠO

¶ . . . go ba le metsotso ye e sego mekae le lena batho. Gomme ke thabetše Ngwanešu Pearry bakeng sa taletšo ye ya go ba mo, le bakeng sa tirišanommogo ya lena yohle.

² Ke nagana ye ke ketelo ya boraro ya rena go toropokgolo ye kaone ya lena. Ka mehla re hweditše batho fa ka botho, gomme ka mehla re bolela, seatla ntle, ge eba ba a go tseba, goba aowa. Ke etetše a mangwe a mafelo a kgwebo, le ka fao go lego bose. Ka mehla go bonala go fapana go feta go lego godimo ka go tonyeng leboa; ba mpona ke tsena ka gare, ba go hlokomela gomme ba ya ntle, gomme seo ke sohle sa yona. Eupša ga se gantsi o etela lefelo ntle le ge yo mongwe a re, “Ke a go leboga! Bowa morago gomme o re bone gape!” Ke rata seo.

³ Ka gona, ke nagana gore Ngwanešu Pearry mo, bjalo ka ge nka mmitša seo, feela . . . Ke yo mogologolo go feta tatagwe, kafao ke a thanka nka kgona go mmitša Ngwanešu Pearry. Ga se ra ke ra tseba mošemane, feela ka boitsebišo bja morwa wa ka, Billy Paul, yo a ilego sekolong le yena. Eupša ge go na le e ka ba mang ka go toropokgolo ye, goba tikologong gohle, ka go phihlelelo ya thelebišene, yoo a tla lahlegago mo letšatšing la mafelelo, e ka se be ka lebaka la gore Ngwanešu Pearry ga se a bea pele matsapa a mangwe le a mangwe go leka go tliša batho go Kriste. Ka kgonthe ga se a tlogela leswika le tee le se la apolwa. Gomme ke tsea wo go ba monyetla wo mobotse wa go ba mo.

⁴ Ge Ngwanešu Pearry a rile go nna, a nka “bolela moletlwaneng wo monnyane” a bego a na le wona, gore ba bangwe ba badirišani ba gagwe ba kgwebo ba tla ba fa. Gabotse, ka kgonthe ga ke seboledi. Ga—ga ke tleleime go ba seo, eupša ke naganne ke tla dira. E tla ba tlhompho go nna, morago ga go ba le taletšo boka yeo, go bolela le ba—ba . . . badirišani ba gagwe ba kgwebo.

⁵ Ke na le monyetla wa go sepela boditšhabatšaba, go dikologa lefase. Gomme ke bolela kudu bakeng sa Ditema tša Banna ba Kgwebo ba Full Gospel. Gomme ke a tseba ye e no ba nako ye nnyane ya kopanelo, kafao ke tla rata go hlagiša se sengwe seo se bego se kgahliša nako ye nngwe. Go be go le monna, morago ga ge ke feditše go bolela . . . E be e le borakgwebo bohole. Gomme, kafao, ka ntle fao go be go le mothaka a etla go nna, gomme a re, “O moreri, a ga o yena?”

Gomme ke rile, “Ee, mohlomphegi.”

⁶ O rile, “Gobaneng o šetšešetše borakgwebo ba morago?”

Ke rile, “Ke nna rakgwebo.”

Kafao o rile, “Oo, o yena?”

Gomme ke rile, “Ee, ke nna—ke nna rakgwebo.”

O rile, “Ke mohuta ofe wa kgwebo o lego ka go wona, mohlomphegi?”

Gomme ke rile, “Netefatšo ya Bophelo bjo Bosafelego.”

⁷ Gomme ga se a nkhwetša feela gabotse. Ke e boletše ka lebelo. O rile, “Oo, in—in Inšorense ya Bophelo bjo Bosafelego.” Ga se ka ke ka bolela inšorense; ke boletše netefatšo, gomme o . . . Eupša ga se ka ke ka mmotša. Gomme o rile, “Bophelo bjo Bosafelego,” o rile, “Ga ke tsebe. Ga ke dumele nkile ka kwa ka yona pele.”

Ke rile, “Seo se befile kudu.”

O rile, “Gabotse,” o rile, “motsemošate o kae?”

Ke rile, “Legodimong.”

⁸ Ke sa le ka kgwebong yeo. Ke rata go bolela pholisi le yo mongwe le yo mongwe wa lena, ka morago ga ge tirelo e fedile, bošegong bjo. Ke mafolofolo kudu ka mošomo wa ka. Gomme, kafao, gomme ga se nke ka re bjale, “inšorense,” ke rile, “netefatšo.”

⁹ Inšorense e lokile, kwešišang. Ke elelwa . . . Nnete, ka nako ye ga ke ne le e ka ba efe.

¹⁰ Ke a elelwa, morago ga ge ke nyetše, mosadimogatša wa ka le nna re be re dutše ka ntlong, letšatši le lengwe. Gomme mogwera wa go loka wa ka . . . Ngwanešu wa ka ke morekiši wa inšorense, Western-Southern. Mošemane yo o be a le morekiši wa Prudential. Ke ile sekolong le yena, mošemane yo mokaone kudu. Ngwanabo—ngwanabo o ngwala *The Upper Room*, ka gore, ke a dumela ke modiredi wa Baptist, gomme o ngwala diathekele ka go pampiri ye nnyane e bitšwago *The Upper Room*. Batho ba bakaone kudu. Kafao o tlide godimo go mpona, letšatši le lengwe, gomme o rile, o rile, “Billy, ke—ke kwa gore o na le lebola le lennyane nako ye nngwe ka inšorense.”

Gomme ke rile, “Ee.”

¹¹ O rile, “Go mohuta wa go go fa maikutlo a mannyane a go galaka go tšona?”

Ke rile, “Aowa, e sego tlwa.”

O rile, “Ke naganne ke tla le go bolela pholisi le wena, Billy.”

¹² Gomme ke rile, “Gabotse,” ke rile, “Wilmer, ditebogo,” ke rile, “eupša ke—ke ne netefatšo.”

Gomme o rile, “Oo, ke maswabi.”

¹³ Gomme mosadimogatša wa ka a lebelela go dikologa go nna, mo o ka rego ke be ke le moikaketši. O tsebile gore ke be ke se na le ye e itšego. O ntebeletše feela go makala. Ke rile . . .

¹⁴ “Oo,” o rile, “ke maswabi, Billy.” O swanetše go be a naganne ke bile le yona le ngwanešu wa ka, Jesse. Gomme ke rile . . .

Mosadimogatša wa ka o ntebeletše. Gomme o . . . ke rile, “Ee, ke ne netefatšo.”

Gomme o rile, “O na le khamphani efe?”

Gomme ke mmoditše selo sa go swana, “Bophelo bjo Bosafelego.”

Gomme o rile, “Oo,” o rile, “a ke yona?”

¹⁵ Gomme ke rile, “Ya. Ke na le: Netefatšo ye e šegofetšego, Jesu ke wa ka! Oo, a tatsopele ya letago le Lekgethwa! Ke mojabohwa wa phološo, morekwa ke Modimo, Motswalwa ke Moya wa Gagwe, mohlatswiwa ka Mading a Gagwe.

¹⁶ O rile, “Billy, yeo ke e botse kudu. Ke leboga seo. Eupša yeo e ka se go bee godimo mo ka serapeng sa mabitla.”

¹⁷ “Eupša,” ke rile, “e tla ntšhetša ntle. Ga ke tshwenyege . . .” Uh-huh. Ya. Ga ke tshwenyege ka go tsena ka gare; ke go tšwela ka ntle.

¹⁸ Ke tla rata go bolela pholisi le wena, morago ga tirelo, ge . . . ke na le nnete Ke therešo.

¹⁹ Bjale, ka mehla ke na le batho go ema ge re bala Lentšu, eupša, bošegong bjo, ke tla leka go tlogela seo gobane go thata kudu—kudu go lena go ema. Eupša feela pele re bala Lentšu, a re nong go inamiša dihlogo tša rena dinakwana di se kae, ge re bolela le Mongwadi wa Lentšu. Bjalo ka ge re be re dira lešata seng, le mohuta wa go hlephiša, goba, bjalo ka ge re e bitša, “go hlephiša moriri wa rena.” Kafao a re yeng ka go lehlakore le lekgethwa bjale, le tlhokofalo, gomme re retolle dipelo tša rena go leba Legodimong ge re bula Lentšu. Bjale motho e ka ba ofe yoo a kgonago go sepetsa diatla tša gagwe a ka bula Beibele, eupša ga go yo motee ka kgonthe a ka kgonago go bula kwešišo eupša Moya wo Mokgethwa wo mogolo, kafao a re boleleng le Yena.

²⁰ Tate wa rena wa Legodimong, ka kgonthe re thakgetše, bošegong bjo, go kgobokanywa fa le sehlopha se sa batho, lehlakore le la Bokagosafelego, le go ba le kopanelo ye kaone ye. Gomme ge re dutše go dikologa ditafola tše, bošegong bjo, re lebelelane go putlana seng sa rena, le badirišani ba kgwebo le—le Bakriste, re a lemoga gore go tla nako ye nngwe ye re tla kopanago le yona. Re a tshepa gore bohole re tla ba Kua, yo mongwe le yo mongwe a lego gona ka go Selalelo se segolo sela sa monyanya ka moyeng, ge Kgoši a tla tšwela ntle, a phumola meokgo yohle go tloga mahlong a rena, le go re, “E dirilwe gabotse, bahlanka ba Ka ba go loka le go botega, tsenang ka mathabong a Morena, ao a lokišeditšwego lena go tloga motheong wa lefase.”

²¹ Ge go ka ba ba bangwe, Morena, bao ba sa Go tsebego ka tsela yeo, gomme ke a rapela bosegong bjo gore se sengwe se tla dirwa goba se boletšwego seo se tla ba dirago go fetola tsela ya bona ya go nagana, go retologela go Wena; ge eba se gona, goba ka mo—mo moela wa thelebišene, goba ka ditheipi tše di tla bego di eya ntle go tloga go le.

²² Re šegofatše mmogo bjale, gomme re šegofaletše palo ya Lentšu la Gago. Retolla dipelo tša rena le dikgopololo go ya bofelong bja bophelo bjo, gomme seemo sa rena e tla ba eng ka nako yeo. Ka gore re na le nnete, Tate, gore rena bohole re swanetše go tlogela lefase le. Re ba hwago, gomme a re lebeleleng go Yena wa Gosafelego, Yena a nnoši a ka kgonago go re fa Bophelo ka godimo ga bjo. Ka Leina la Morwa wa Gagwe, Jesu Kriste, re a e kgopela. Amene.

²³ Ke rata go bitša šedi ya lena, dinakwana di se kae bjale, go palo ya Lentšu la Modimo. Ke tla rata go thoma go bala go tšwa go Ebangedi ya Mokgethwa Mareka, ke a nagana tema ya 10, le go thoma ka temana ya 17.

Gomme ge a ile pele ka tseleng, fao gwa tla go yena yo motee a kitima, gomme a khunama fase... gomme a mmotšiša, a re, Mong yo Botse, ke tla dira eng gore ke rue bophelo bjo bosafelego?

...Jesu o rile go yena, “Gobaneng o mpitša yo botse? ga go yo botse eupša yo motee, gomme yoo ke, Modimo.

Melao o a e tseba, O se ke wa otswa, O se ke wa bolaya, O se ke wa utswa, O se ke wa bea bohlatse bja maaka, O se ke wa radia, Hlompha tatago le mmago.

Gomme a araba gomme a re go yena, Mong, dilo tše ke di lotile ge e sa le go tloga bosweng bja ka.

Ka gona Jesu ge a mo lebelela a mo rata, gomme a re go yena, o hlaelwelwa ke Setee: eya ka tsela ya gago, rekiša eng kapa eng o nago le yona, gomme o fe bahloki, gomme o tla ba le mahumo legodimong: gomme o tle, gomme o tsee sefapano sa gago, gomme o ntatele.

Gomme o ile a nyama ka polelo yeo, gomme a tloga a kgopišitšwe: ka gore o be a na le dithoto tše kgolo.

²⁴ A nke Morena a oketše ditšhegofatšo tša Gagwe go Lentšu ge re katanela go goga go tšwa go le sehlogo le kgwekgwe. Bjale go naganeng ka thuto ya go ba le batho ba kgwebo, gomme ka mehla ke nagana gore batho ba kgwebo ka mehla ba ne kgahlego ka go—ka go dipeeletšo tše botse, gore ke bitše sehlogo bjale bakeng sa dinakwana di se kae tše di latelago: *Dipeeletšo*.

²⁵ Rakgwebo yo mokaone ka mehla o lebeletše ye—ye botse, peeletšo ya go kwagala. Ge a se, gona ga se rakgwebo yo mokaone. O swanetše go lebelela se sengwe se e lego sa nnete.

²⁶ Gomme ke rata go bolela le lena ka taletšo ye ke le fago yona dinakwana di se kae tša go feta, go pholisi ye ya Bophelo bjo Bosafelego, bjalo ka ge ke itsebišitše ka bonna bjalo ka ra—ra rakgwebo. Gomme ke na le kgwebo, gomme ke rata go bolela le lena dinakwana di se kae ka yona. Gomme Mangwalo a se makae ke a ngwadilego fa, le sehlogo, ke tla rata go šomiša tše bakeng sa dinakwana di se kae, dinoutse tše.

²⁷ Ga se taba ye—ye botse go kempola. Motho e ka ba mang o tseba seo, gore go kempola ga se kgwebo ye botse, gobane ke go leka mahlatse. Ga se nke, goba ga se gantši go bona lekempolara . . . Letšatši le lengwe ke monna wa mohumi, gomme letšatši la go latela o a kgopela. Kafao o tsea bontši kudu bja sebaka, go—go kempola. Ke a nagana le—le—le lekempolara le—le no phela ga bonolo godimo ga lethabo la nakwana, gomme a se a lebelela pele go bokamoso, goba o be a ka se be go kempola.

²⁸ Ga ke dumele go dipeeletšo tsoko tše tša go huma ka bošego botee, e ka ba, ka kgwebo e rilego ya go se tsebje. Bjale, rakgwebo yo mongwe le yo mongwe o be a ka se kgone go leka mahlatse ka mokgwa woo, mohlomongwe dipolokelo tša bophelo bja gago—bja gago, letseno la gago; gomme o tla le beeletša ka go tše dingwe go batamela, go huma thwi ka pela. Gomme ga e tsebalege. Yo mongwe o kitimetše ka gare ka mohuta tsoko wa kgopololo, gore, “Mo re—re na le feme ye e itšego mo,” ga go bokamorago go yona. Ke nagana wa go loka, monna wa go nagana gabotse o tla ba lešilo go leka go dira peeletšo ka go kha—kha khamphani bjalo ka yeo.

²⁹ Gobane, ke bile le mogwera, nako ye nngwe, yoo—yoo a lekilego selo se sebjalo. Gomme, ge a dirile, o—o lobile se sengwe le se sengwe a bego a na le sona, gomme o lobile tšohle tša letseno la bophelo bja gagwe. E ka ba go lokela go rola modiro, gomme o naganne, “Gabotse, ke tla—ke tla leka mahlatse a,” ka gobane monna o bonagetše go ba o tsebile se a bego a bolela ka sona. Eupša, go tla go hwetša, kha—kha khamphani e be e no ba khamphani ya bodumedi bja maitirelo, gomme go be go se setoko goba selo, kafao moisa wa go šokiša o lahlegetšwe ke se sengwe le se sengwe a bilego le sona.

³⁰ Kafao ke a nagana, ge monna a nyaka go dira peeletšo ye botse, o swanetše pele go lekola khamphani ya gagwe, goba e ka ba eng a dirago peeletšo ya gagwe ka go yona, le go hwetša ntle se a yago go se dira. Ke a nagana motho mang kapa mang wa go nagana ka kgopololo tla dira seo.

³¹ Gomme ka gona gape, pele ke eya pele, ke rata go re, ga se kgopololo ye botse go boloka tšhelete ya gagwe ka potleng ya gagwe. Batho ba bantši ba re, “Ke tla—ke tla no e bea ka potleng ya ka, gomme ke—ke . . . gomme ke e hweditše.” Eupša, le a tseba, lena borakgwebo le basadi, ga le nagane ka go mabaka ao. Gomme ga se selo se sebotse, ka gore e ka utswiwa.

³² Go kaonekaone go ba le yona e elela. Go swana le ge Morena a boletše, nako ye nngwe, O file ditalente tše ntši kudu go ba bantsi kudu, le tše bjalo, gomme ka gona o...ba dirile peeletšo ka yona. Gomme bao ba dirilego ye botse, peeletšo ya go kwagala, O ba fa mašokotšo. Eupša ge monna yo motee a rile, “Ke—ke nno e boloka. Ga—ga se ka nyaka go leka mahlatse. Ke—ke—ke e beile ka potleng ya ka. Goba, ke e bolokile felotsoko.” Ka gona O tšere se A mo filego sona, le go se fa go bona bao ba bilego le mašokotšo a mantši, bao ba a beilego go peeletšo ye botse. Gomme yeo ke tsela ya Morena wa rena ya go dira dilo.

³³ Bjale, eupša ge o be o eya go beeletša ka go se sengwe seo o bego o nyaka go ba le nnete ka go sona, o tla hwetša ye nngwe ya go loka, ya go tshepega feme ye e netefaditšwego gore e tla lefa gabotse. Bjale, yeo ke ye botse, peeletšo ya go kwagala. Morago ga ge o lekile feme, o tseba bokamorago bja yona, o boletše le yo mongwe yo a dirilego kgwebo le feme ye, le go kwa bopaki bja yo mongwe le yo mongwe, “Ke diphesente tše lekgolo. Ka mehla ba thwi mothalong le mašokotšo a bona. Gomme—gomme go na le mothopo wo mogolo wa photo ka morago ga yona, gore khamphani ga e ye go phuhlama.” Gomme yeo ke ye botse, peeletšo ya go kwagala. Gomme bjale, gohle go kgabola bophelo, batho ba rutilwe seo.

³⁴ Bjale re bolela bošegong bjo ka Lengwalo, ka mošemane yo moswa wa Mohebere, yoo a bego a le mo—mo mohuta wa mohumi wa mohlankana. A ka no ba a etšwa legaeng le lebotse ka kgonthe, ga go pelaelo. Bopaki bja gagwe bo bontšitše gore o be a etšwa go le—le legae le lebotse. O be a bitswa, ka Beibeleng, “mmuši yo moswa wa mohumi.” Ke ya go e fetola bošegong bjo, feela gannyane nthathana, ka re, “rakgwebo yo moswa wa mohumi,” gobane o be a ne kgwebo, gomme o be a ne kgahlego ka go—ka go kgwebo. Gomme ntle le go kamaka tatagwe e be e le rakgwebo yo mogolo wa go atlega, goba go molaleng gore o be a ka se be le se a bego a na le sona. Eupša o godišitšwe go—go ba rakgwebo.

³⁵ Gomme o bone se sengwe ka go Moisa yo moswa yo wa Galelia, Moprefeta yo moswa yo ka Leina la Jesu wa Natsaretha. Ga go pelaelo o be a kwele moprista wa gagwe a bolela ka Yena, gomme mohlomongwe kgahlanong le Yena. Eupša ge a hweditše go getsola ga gagwe ga mathomo go Morena Jesu, go be go le selo se sengwe ka Yena se se bego se fapania le monna yo mongwe le yo mongwe.

³⁶ Gomme ke bolela se, bjalo ka Mokriste, ka therešo ga gwa fetoga. Re na le baithutamodimo ba bagolo ka nageng, go kgabola lefase, re bile le bona lebaka la dikete tša mengwaga, bao ba ka kgonago go tsebiša go rena thu—thu thutotumelo. Gomme ba rutetšwe ka go dithutotumelo tšela, le kereke yeo—yeo e lego kereke ya go tsengwa gabotse. Eupša yeo go le bjalo ga se pholisi

ya ka—ya ka bošegong bjo ke bolelago ka yona. Ke bolela ka Bophelo bjo Bosafelego.

³⁷ Gomme moisa yo moswa yo, a tseba gore o be a le moleloko wa kerekke, eupša go boneng ka go Jesu se sengwe go fapana. Kafao o ile a fiwa sebakabotse go dira peeletšo, ge a hweditše Jesu le go bona se A bego a se dira. Gomme o be a badile Beibele ya gagwe, le go bona ka go Jesu gore selo se a se kwelego baprofeta ba gagwe ba bala ka kerekeng ya gagwe, le se ba bego ba le sona. Gomme o be ntle le pelaelo a ithutile seo. Gomme ka gona ge a bone ka go Jesu yo wa Natsaretha, yo a bego a swanetše go ba magareng ga batho, Moprefeta, o bone se sengwe ka go Monna yo seo se Mo tsebagaditše le Mangwalo.

³⁸ Gomme ke a nagana, lehono, ga se go fetoge kudu. Babadi ba Beibele le barati ba Beibele, ge ka kgonthre re hwetša go getsola ka go bohlale bja rena, ga se Jesu a bilego le se A lego, se fetola mokgwatebelelo wa rena ka moka. Ga go yo mongwe boka Yena, ga go kgathale o lokile bjang. Re rile re a kwešiša gore O...Re a nagana O be a se ne sekolo se sentši, gomme O boletše bjalo ka monna wa mehleng, le go apara bjalo ka monna wa mehleng, le go phela le monna wa mehleng. Eupša go le bjalo go be go le se sengwe sa go ikgetha ka Monna yo, gomme se gogile šedi ya moisa yo moswa yo. Bontši kudu, gore, o bile le lehumo lohole la lefase, mohlomongwe, leo a bego a le hloka gomme o tla le šomiša ka nako ya bophelo bja gagwe, gomme o be a kgotsofetše gabotse ka seo. Eupša o bone gore Monna yo o lebeletše ka go bokamoso le go ba botša dilo tše di bego di etla, le go itsebagatša Yenamong ka go Lengwalo, gomme Modimo o itsebagaditse Yenamong ka go Monna.

³⁹ Bjale ga go monna yo a phelago, yo a lego ka monaganong wa gagwe wa maleba, eupša yo ka mehla a makalago moo a tšwago gona, ke yena mang, gomme o ya kae? Go bile dipuku tše dintši di ngwadilwego, difilosofa di tsogile le go wa. Eupša go ne Puku e tee feela yeo e tla go botšago o mang, moo o tšwago gona, le moo o yago, gomme yeo ke Beibele. Yeo ke Puku e nnoši. Go dipuku tšohle tše kaone re nago le tšona, o ka kgona go di senya, ye nngwe le ye nngwe. Ye ke Therešo. E ka ba eng kgahlanong le Ye ga se nnete. “Magodimo le lefase di tla feta, eupša Lentšu la Ka le ka se tsoge la palelwā. Lentšu la motho yo mongwe le yo mongwe e tla ba maaka; la Modimo e tla ba therešo.”

⁴⁰ Gomme ge le bona se sengwe ka kgonthre kudu pele ga lena, le Mangwalo a a tshepišitšwego bakeng sa letšatši leo, seo Mesia yola a bego a swanetše go ba sona. Gomme lesogana le le bone seo se tsebagatšwa ke Modimo, ka gona seo se dirile Jesu go fapana go tloga go monna yo mongwe le yo mongwe a kilego a mmona. Kafao, o ile a fiwa sebakabotse.

⁴¹ Ge a hweditše Morena Jesu, gomme mohlomongwe a Mmone ka dikopanong tša Gagwe le tirelo ya Gagwe, o kitimetše go Yena

le go wela fase maotong a Gagwe, go bontšha mokgwatebelelo wa gagwe wa go batamela o be o nepile.

⁴² Gomme o rile, “Mong yo Botse, nka dira eng go ba le Bophelo bjo Bosafelego?” Bjale seo ke selo se se logo potšišong. E sego tšelete ya gagwe, goba aowa, “A nka kgona go tšoena kereke ya Gago, Mohlomphegi? Goba a nka kgona go ba wa mokgatlo wa Gago?” Eupša, “Ke dire eng go ba le Bophelo bjo Bosafelego?” Yeo e be e le potšišo.

⁴³ Gomme o ile a fiwa sebakabotse go Bo amogela, eupša o ile a dira sephetho sa phošo. O be a . . . o bo ganne. O be a se ne kgahlego, ge a hweditše se se ilego le bjona. O lemogile, gore gore a dire se, o be a swanetše go tlogela botsebalegi bja gagwe. Ka gobane, Jesu o be a se motsebalegi, go se dumelwe magareng, ke tla re ka go itlhaola, diphesente tše masomesenyane tša batho, goba mohlomongwe diphesente tše masomesenyane tlhano di bile. O be a sa dumelwe, bjalo ka motho yo mongwe wa “moya wo mobe,” gomme a bitšwa, ke ba bantši, “Beletsebubu,” diabolo.

⁴⁴ Gomme, go le bjalo, Mangwalo ka go phethagala a Mo tsebagatša. O be a šupeditše morago go bona, a re, “Phetlang Mangwalo, ka gore ka go Wona le nagana gore le na le Bophelo bjo Bosafelego. Gomme Ke Wona a pakago ka Nna, goba a bolelago gore Ke nna Mang.”

⁴⁵ Mošemane yo wa Mohebere, a godišitšwe ka gae, le go tseba gore Beibele e be—e be e ba boditše ka go hlaka, disekorolo. Modimo Jehofa o be a boletše gore, “Ge fao go ka tsoga yo motee magareng ga lena, yo e logo wa semoya, goba moprofeta, Nna Morena ke tla itsebiša Nnamong go yena ka dipono. Gomme ge se a se bolelago se etla go phethega, gona kwang moprofeta yola, gobane Ke na le yena. Eupša ge go sa direge, gona le se e kwe.”

⁴⁶ Leo ke leleme la pepeneneng. Le no ba go nagana ga go kwagala feela. Ge a e boletsé, gomme ga e direge, gona ke maaka; Modimo ga se a e bolela. Eupša ge a re, gomme se—se a direga, yeo ke therešo; gomme ga go selo se logo bontši, bontši go rereša go feta therešo.

⁴⁷ Kafao lesogana le le bone se ka go Morena Jesu, le go tseba gore O swere dikgonyo go ya go Bophelo bjo Bosafelego bjo, gomme o be a nyaka Bophelo bjo Bosafelego bjo, eupša o ganne sebakabotse go dira peeletšo ya gagwe. O be a se ne kgahlego ka go peeletšo ye bjalo. Le ge . . .

⁴⁸ O be a tsebagaditšwe gabotse gore O be a le Morwa wa Modimo. E tsebagaditšwe ka go phethagala. Kgarebe e imile, e tlišitše pele Morwa. O be a dirile leswao le lengwe le le lengwe leo Mesia a bego a swanetše go le dira.

⁴⁹ Eupša gore a Mo amoge, o be a swanetše go tloga go motlwae wa gagwe. O be a swanetše go retologa go tloga go wona.

⁵⁰ Re rata go neela seo feela go... mošemane yo wa Mojuda, eupša go befile kudu re swanetše go e lemoga, lehono, tsela ya go swana. Ke theko ye kgolo. Re ka kgona go neela go dikereke tša lehono. Gomme makga a mantši, batho ba ba ipitšago badumedi bonabeng, gomme ba sa rate go ikaroganya bonabeng le go tloga go dilo tša lefase, bjalo ka ge mmuši yo moswa yo a kgopetšwe go dira, go ba le pholisi ya Bophelo bjo Bosafelego. Go le bjalo, ka morago, le rena re E bona gabotse e tsebagaditšwe ke Lengwalo, gore Dipholisi di sa fiwa e ka ba mang a nyakago go Bo amogela.

⁵¹ Bjalo ka ge ke boletše, o bone se sengwe ka go Jesu, ga go motho a bilego le sona, eupša tefo e be e le ye kgolo kudu gore o be a sa nyake go lefa tefo.

⁵² Ke selo sa go swana lehono. Bjalo ka ge ke dumela, bošegong bjo, nka no be ke bolela le dikerekemaina tša go fapania, Methodist, Baptist, Presbyterian, Katoliki ya Roma, Orthodox Mojuda, Buddha, e ka ba eng gape, bao ke batho ba kgwebo ba ditoropokgolo. Eupša go na le, ka kgonthe, ge o bona se sengwe ka mahlo a gago mong, seo Mangwalo a se tsebagatša go ba therešo; re tla be re le batho ba go se hlaologanye kudukudu, gore, ge re ne kgahlego ka go Bophelo bjo Bosafelego, go Bo gana. E tla ba se—se sephetho sa phošo go swana le ge lesogana le le dirile. Makga a mantši, eibile le baruti ba rena lehono ba dira phošo ya go swana ye, le ge dirutegi tša go natha ka dithutotumelo, ba ba e tsebago A go fihla go Z. Eupša, elelwang, baprista bale ka letšatšing lela ba tsebile disekorolo, go tloga go A go fihla go Z, le bona, eupša ba štilwe go bona se lesogana le le se bonego.

⁵³ Gomme o be a ne kgahlego ka go—ka go Jesu go mo fa Bophelo bjo Bosafelego. Eupša ge a hweditše se se bego se eya go mo tšeela, gona o be a se ne kgahlego.

⁵⁴ Le a tseba, Beibele e a re botša, ka go lebaka le leo re phelago. Bjalo ka ge wa rena wa mogau kudukudukudu Ngwanešu Pearry mo a re hlatholletše, gore o be a dumela gore e be e le ka matšatšing a mafelelo. Ka kgonthe, ka maatla ke dumela seo ka pelo ya ka yohle. Ke a dumela Lengwalo le a e tsebagatša.

⁵⁵ Ke dumela gore—gore—gore saense e a e tsebagatša. Borasaense ba re, “Ke metsotso ye meraro go fihla bošegogare.” Ma—ma... Mananeo a rena ao re a bonago go thelebišene le—le go seyalemoya, le—le ka fao batho ba rena ba dirago, ke...

⁵⁶ Bjalo ka ge ke dirile tshwayo fa goba felotsoko gape, gore e a nkgopotša, ya go ya pele gohle moo ba dirago, e nkgopotša ka mošemane yo monnyane a eya go kgabola serapa sa mabitla nakong ya bošego, a letša molodi, go leka go itira yenamong go nagana ga a boife, eupša o a dira.

⁵⁷ Seo ke se e lego bothata ka go retologela ga rena gohle re dirago lehono, ga go ya pele gohle ga rena ga go tuma. Re leka go dira batho go nagana gore ga re tsebe gore iri e batametše, eupša

re a tseba e gona. Borasaense ba rena ba a e tseba. Ya rena . . . Pentagon e a tseba. Bohle, bohle re a tseba gore go na le selo se sengwe se se lokelago go direga. Wena, o kgona go e kwa thwi ka boemong, gomme re a tseba e kgauswi.

⁵⁸ Gomme Beibebe ya rena e a re botša, ka go Kutollo tema ya 3, gore kereke mo lebakeng le e ya go tsebagatšwa feela boka yo wa mohumi, yo moswa, mošemanne wa Mohebere, “go huma, go se hloke selo,” Lebaka le la Laodikia. Ge go ka direga go ba badiredi mo, goba babadi ba Beibebe. Le ke Lebaka la Laodikia. Gomme le rile, “Ka gobane ke humile, ke dutše bjalo ka kgošigadi, ga ke hloke selo.” O rile, “A ga o tsebe gore o madimabe, o a diila, o foulfetše, o a šokiša, o hlobotše, gomme ga o e tsebe.” Selo sa go nyamiša sa setsopolwa se sa Lengwalo ke . . .

⁵⁹ Ge re bone monna goba motho mo mokgotheng, yo a bego a foulfetše le go hlobola le go šokiša le go diila, yeo e tla ba po—po ponagalo ya go šiiša. Ga go yo motee eupša yo a ka kitimelago go bona ka pela ka mo ba ka kgonago, le go re, “Mogwera, o hlobotše. O swanetše—o swanetše . . . O senotšwe. Etla ka gare, ka pela, gomme—gomme—gomme a nke ke go fe diaparo. Gomme ke tla go iša go felotsoko go bona ge eba nka kgona go hwetsa matwetwe, gore ba kgone go bušetša go bona ga gago,” goba go leka go direla motho se sengwe.

⁶⁰ Go ka reng ge o kopane le motho yo bjalo ka yoo, gomme ba tla retologela go go dikologa le go go botša go hlokomela taba ya gago mong? Ebile ga ba tsebe ba ka seemong sela. Bjale ge o le ka tsela yeo, gomme o e tseba, ga se gwa befa kudu. Eupša ge o le ka tsela yeo, gomme o sa e tsebe, yeo ke karolo ye mpe. O ka se kgone go ba botša.

⁶¹ Gomme Lengwalo le le swanetše go phethagatšwa, bjalo ka ge Mangwalo ohle a swanetše go phethagatšwa. Beibebe e boletše gore le e tla ba leemo ka matšatšing a mafelelo. Gomme ba ganne Jesu, gomme O be a le ka ntle ga kereke, a leka go tsena ka gare. Ba e ganne, feela ka go ba pepeneneng bjalo ka ge Mohebere yo moswa yo a dirile. Gomme ye e be e le kereke ya Bantle, kereke Monyalwa, e bileditšwego ntle, e bitšwa “kereke ya Bokriste” ka matšatšing a mafelelo, eupša ba Mmeile ka ntle ka lebaka le le swanago leo rakgwebo yo moswa wa Mohebere a Mo raketšego ka ntle. Tefo e be e le ye kgolo kudu. Ga se ba kgone go E amogela.

⁶² Beibebe e boletše mo gore ba be ba “humile,” e rile ba “be ba sa hloke selo.” Mošemanne yo moswa yo o be a humile, o be a sa hloke selo. “Re kerekeleina ye kaone ye e nago le ditaelo tše kgolo di agilwe. Re na le bongwanešu. Re na le sohle *se, seo*, goba *se sengwe*. Re bile le dithutotumelo tša rena lebaka la makgolo a mengwaga. Re a dula. Ga re hloke selo. O se re botše e ka ba eng ka Lona!”

⁶³ Gabotse, woo ke bontši bja mokgwatebelelo wa kgang go feta moisa yo moswa yo a o tšerego. Ga se a tšee mohuta woo wa mokgwatebelelo. Beibele e boletše, gore, “Jesu o lebeletše godimo ga gagwe gomme o mo ratile.”

⁶⁴ Ke a makala lehono, ge eba magareng ga kgakanego yohle ya rena le bolefase bja rena, gomme go le bjalo re leka go swara boipolelo bja rena bja Bokriste, ge e se lerato la Modimo leo le gapeletšago bodiredi go dula tšhemong. Ke a makala ge eba ga se selo sa go swana, bjalo ka ge fa re Mo hwetša a kokota mo lebating, a leka go tsena. Bjale re hwetša dilo tše, tšona tšohle go kgabola mabaka, go bile ka tsela ye.

⁶⁵ Bjale, go boloka nako, go bolela ka pholisi gape, gomme lebakana feela go e bea mothalong bakeng sa gago.

⁶⁶ Bjale mošemane yo wa mohumi, ga se a kgopela go tšoena kereke ya Gagwe. O—o be a le wa kereke. E e netefaditše.

⁶⁷ Jesu o rile go yena, “Boloka melao. Wena o a e tseba. O se ke wa dira bootswa. O se ke la utswa. O se ke wa aketša, wa radia. Gomme—gomme wa dira, gomme—gomme ka gona hlompha tatago le mmago.”

⁶⁸ Gomme moisa yo moswa yo o netefaditše gore o be a le yo—yo mokaone, mošemane wa setšo, e segó feela ba bangwe ba re bego re ka ba bitša lehono, le—le legwaragwara. O be a le mohuta wo mokaone wa mošemane, a godišeditše ka lapeng le lebotse. O rile, “Mong, ke dirile tše ge e sa le ke le mošemane, bophelo bjohle bja ka.” Le a bona, go laeditše gore batswadi ba gagwe e be e le batswadi ba bakaone. Ba gagwe ba ile go kereke yeo e dumetšego go bolokeng melao. Eupša go le bjalo, ka kerekeng, go boloka melao, go le bjalo ga se gwa ke gwa araba se a se bonego ka go Jesu. O tsebile.

⁶⁹ Le thutotumelo ya rena le kereke ya rena, le go boloka melao, go le bjalo ga go re fe Bophelo bjo Bosafelego. Ga se gwa ke nako yela, le bile ga e e dire lehono. Go na le selo se sengwe o swanetšego go se dira.

⁷⁰ Bjale, re hwetša gore e be e se ka gobane gore o be a se moleloko wa kereke. E be e se ka gobane o be a se gabotse ka maitshwaro. O be a le.

⁷¹ Eupša re ka kgona go ba leloko la kereke, le maitshwaro gabotse, go le bjalo ra se hwetše Bophelo bjo Bosafelego. E segó go tseba Lentšu; ba bangwe ba bona ke baithutamodimo, le dirutegi, le barutiši ba sekolo sa Lamorena, bahlaramolli ba Beibele, eupša seo ga se re selo. Sathane o tseba Beibele yela bokaonana go phala e ka ba ofe wa rena. Beibele e rile, “Go tseba Yena ke Bophelo,” e segó go tseba Lentšu. “Go tseba Yena ke Bophelo.” Sathane gape o a dumela le go roromela. Eupša re swanetše go ba le boitemogelo bja lehu, poloko, le tsogo, go tšwa go bophelo bja rena bja kgale, go ya go Bophelo bjo boswa bjo bo

tlago ka go Kriste. Bo tla feela ka Moya wo Mokgethwa, Bophelo bjo boswa.

⁷² Bjale a re nyakišeng ba bangwe ba batho ba tlase go kgabola mabaka, bao ba swerego pholisi ye, le go bona ge eba e a patela goba aowa. Gona ke tla no rata go le tliša, bjalo ka ge ke le boditše mo mathomong, gore o swanetše go botšiša yo mongwe ge o eya go dira peeletšo; hwetša ntle se se diregago, ke eng, a e lefa gabotse. O swanetše go dira seo ka kgwebong ya gago. Ke nyaka go bolela ka ba bangwe ba baswari ba pholisi ye.

⁷³ Ke tliša go šedi ya lena, bošegong bjo, morago ka go Genesi, go moprofeta ka leina la Noage. Le ge a lekilwe ka tsela ye nngwe le ye nngwe a kgonnego, go tsela ye nngwe le ye nngwe Sathane a kgonnego go mo leka, go mo dira gore a neele pholisi yela; eupša Noage o ile a swara tshepišo ya Modimo, pholisi ya Bophelo, gobane Modimo o mmoditše gore se sengwe le se sengwe ka ntle ga areka yela se tla senywa, gomme le ge go bonagetše mohuta wa go se tlwaelege go batho ba go nagana sebjalebjale ba letšatši la gagwe.

⁷⁴ Seo ke se se dirago Ebangedi lehono. Ke go se tlwaelege, ka gore Modimo ga se a tlwaelega. Lentšu la Gagwe le hlatholotšwe go se tlwaelege go se dinako tše dingwe re Le hlathollago.

⁷⁵ Eupša, bjalo ka ge ke boletše pele, Modimo ga a hloke motho go hlatholla Lentšu la Gagwe. O dira tlhathollo ya Gagwe Mong ka—ka go tliša go phethega dilo tše A boletšego gore O tla di dira. O hlatholla Lentšu la Gagwe Mong. Ga A nyake tlhathollo ya rena. Ke, tlhathollo ya rena ke megopolو ya rena beng ya madirwakemotho ye re e beilego le Lona.

⁷⁶ Ge Modimo a rile, “A go be seetša,” gomme fao gwa ba seetša. Seo ga se nyake tlhathollo.

⁷⁷ Modimo o rile, “Kgarebe e tla ima,” gomme e dirile. Seo ga se nyake tlhathollo ye e itšego.

⁷⁸ Jesu o rile, “Morwa wa motho o rotogela Jerusalema gomme a fiwa ka diatleng tša motho wa sebe. Ba tla Mmapola, gomme ka la boraro O tla tsoga gape.” Seo ga se nyake tlhathollo.

⁷⁹ O rile, “Lebakana le lennyane gomme lefase ga le sa Mpona gape; efela lena le tla Mpona, gobane Ke tla ba le lena, eibile le ka go lena, go fihla bofelong bja lebaka, go fihla pheletšong.” O mo. Ga e nyake tlhathollo ye e itšego. Ke tshepišo ya Gagwe.

⁸⁰ “Mediro ye Ke e dirago o tla e dira le yena. Yo a dumelago ka go Nna, mediro ye Ke e dirago o tla e dira le yena.” Seo se hwetšwa ka go Mokgethwa Johane 14:12. Gomme re a tseba gore yeo ke therešo, kafao ga e hloke tlhathollo e ka ba efe.

⁸¹ Noage, ka Lentšu la Modimo, o swareletše go Lona, ka gore o be a le moswari wa inšorense ya Bophelo, netefatšo ya Bophelo. O be a swere pholisi. Gomme o be a le modiredi wa pholisi, gomme o ile pele mogohle. Eupša ka gobane e be e le go se tume, o be a

sa kgone go hwetša e ka ba mang go e swara, feela lapa la gagwe mong. O be a . . . Ya gagwe—ya gagwe pholisi e be e bonala yohle e le ka ntle ga peelano, go batho. Go bonagetše go ba kgahlanong le go fa mabaka ga saense ga letšatši. “Dipula di etla fase go tšwa legodimong.”

⁸² Ga se ya ke ya tsoge ya na godimo ga lefase, le a elelwa. Lefase le eme go otlologa. Re ka netefatša seo lehono, gore le kile la ema ka tsela yela. Gomme Modimo o nošeditše dimela ka go nošetša, go tšwa go didiba lefaseng.

⁸³ Bjale saense, mo letšatšing leo, go molaleng ba be ba le bohlale kudu go feta ka fao ba lego bjale, gobane ba agile disefintshe le diphiramiti, le—le go ya pele, dilo tše re ka se kgonego go di dira lehono. Ga re ne maatla ao a kgonago—kgonago go e dira, eupša ba e agile. Gomme ke a nagana mohlomongwe ba thuntše ngwedi ka ratara goba e ka ba eng ba bilego le yona ka go letšatši lela.

⁸⁴ Jesu o rile, “Bjalo ka ge go bile matšatšing a Noage,” tlhabologo ye nngwe e swanagoe le yela, “go tla ba bjalo ka go tleng ga Morwa wa motho.”

⁸⁵ Re bona fa go se kgale moo ba epilego meela ya meetse ya sebjalebjale fa ka Mexico ya kgale, ga ba ne histori ya yona, le gannyane. Le a bona, go ka no ba go bile go tloga go lebaka tsoko le lengwe le fetilego.

⁸⁶ Jesu o rile, “Bjalo ka ge go bile ka letšatšing lela,” monna wa setswerere, a hlalefile. Eupša ge go bile, gona go tla ba le pholisi ya Bophelo e neetswego batho. O boletše bjalo.

⁸⁷ Gomme, Noage, a ka no se kgone go hhalosa. Bjalo ka ge saense e rile, “Re ka tsea didirišwa gomme ra netefatša ga go na pula godimo fale. Mohlomphegi, o tšwile mogopolong wa gago.” Eupša go le bjalo o be a tseba Segalontšu se se boletše le yena e be e le Modimo.

⁸⁸ Kafao ge Modimo a be a rile, “Go be go le meetse a etla go tšwa godimo,” le ge go be go se meetse, Modimo ke Elohim, Yena a lego gona ka boyena. Ke Yena wa go lekanelo moka. Ge A rile, “Go ka kgona go ba meetse godimo kua,” O kgona go bea meetse godimo kua, go boloka Lentšu la Gagwe.

⁸⁹ Tatawešo Abraham, yo ka go tate wa ditšhaba tše dintši. Ge go ka direga go ba batho ba Bajuda ba dutše kgauswi, ke makala ka fao Bantle ba tlišitšwego ka gare, Abraham o be a le tatago ditšhaba tše dintši. “Gomme ga se a tekateka go tshepišo ya Modimo ka gosedumele.” O be a swere pholisi le yena. Modimo o be a mo diretše tshepišo, go ba tatago ditšhaba tše ntši; e sego feela ditšhaba tša Bahebere, eupša ditšhaba tše dingwe, gore o tla ba tatago tšona.

⁹⁰ Elang hloko, bjalo ka ge a dirile, tshepišo ye Modimo a mo fago e be e le ya ka pela, ya makgwakgwa. O be a le

bogolo bja mengwaga ye masomešupa tlhano, gomme Sarah o be a le masometshela tlhano, pele a hwetša tshepišo. Eupša o ikarogantše yenamong go basedumele, gobane o tsebile o be a le mojabohwa wa toko ka thato ya Modimo, gomme ga go kgathale go tšerwe botelele gakaakang!

⁹¹ Mohlomongwe kgwedi ya mathomo e fetile gomme o rile go Sarah, “O ikwa bjang?”

“Ga go phapano.”

⁹² O rile “Re tla ba le lesea, go le bjalo. Modimo o boletše bjalo. Eya pele gomme o dire diputsu. Bea se sengwe le se sengwe komana. Modimo o rile re tla ba le lona. Seo se a e ruma.”

Ngwaga wa pele o fetile. “Morategi, o ikwa bjang?”

“Ga go phapano.”

⁹³ “Gabotse, e ya go ba mohlolo wo mogolwana go feta o bilego ge o diragetše kgwedi ya mathomo.”

⁹⁴ Le a bona, o be a ka ba mengwaga ye lesome go feta menophose ge tshepišo e filwe. Ba be ba se na le bana. O be a le moopa, gomme o be a sa belegiše. Kafao ba... Eupša o be a sa swere pholisi yela, gobane e be e le Lentšu la Modimo, tshepišo. O be a sa ye go arogana le yona. Gomme Beibele e boletše, gore, “Abraham ga se a tekateka go tshepišo ya Modimo ka gosedumele; eupša o be a tiile, a efa tumišo go Modimo; a tseba se, gore, O kgona go dira se A tshepišitšeego go se dira.” Ka fao ngwana o belegwe, ka baka la gore o be a swere pho—pho pholisi.

⁹⁵ Noage o ile a swara pholisi ya gagwe, gomme ya phološa bophelo bja gagwe. Yeo e be e le tefelo. E sego bophelo bja gagwe feela, eupša bophelo bja lapa la gagwe; bo lefetšwe, ka go ba phološa.

⁹⁶ A re boleleng ka mmeleetše yo mongwe ka go inšorense ye ya Bophelo bjo Bosafelego. Daniele moprofeta, ge re ka e bitsa... Ĝe le ka e swarela, bjalo ka tlhagišo ya selefase; ga ka swanelo go e dira, ke a nagana, fa mo phuluphithing. Ke tsela e nnoši yeo ke tsebago go e dira, “ge ditshetla di le fase.” Kgoši Nebukadinetsara o be a tlide ka gare le go tšeа bana ba Israele gobane ba be ba tlogile go Modimo. Ba bile; ba sa dira dihlabelo tšohle tša bona.

⁹⁷ Ge Modimo a ba kgopetše go neela dikwana le dipowana, le go ya pele. Monna, Mojuda yo mokaone, o sepetše go theoga tsela, ka powana ye e nonnego goba—goba—goba kwana ye nnyane ka tlase ga letsogo la gagwe. Ka letšatši la poelano, o ile tlase go e neela bakeng sa sebe sa gagwe. O be a hlokofetše ge a be a bolaya kwana yela, gomme moprista o e hlabile. Gomme o ile a swara diatla tša gagwe godimo ga yona, a tseba gore bophelo bo be bo tšeetšwe go phološa bophelo bja gagwe. O be a hlokofetše ka bjona. Gomme ge feela a be a hlokofetše, go be go lokile. Eupša nako ya tla ge go eba motlxae wa lapa. Ka gona Modimo o rile,

O rometše moprofeta lefelong la tiragalo, ka leina la Jesaya, O rile, "Dihlabelo tša lena, mekete ya go hlomphega, di a nkga ka nkong ya Ka."

⁹⁸ Fao ke mo rena batho re fihlilego. Re tšoenne kereke. Yeo, e lokile, re dira dilo tše. Eupša, o re, a ke wena Mokriste? "Ke nna Momethodist. Ke nna Mobaptist. Ke nna Mopresbyterian, Mopentecostal, goba se sengwe gape." Ke setšo. Fao ga go go tsena, ka tlhokofalo, gape. Ba ka se sepelele godimo, ba kgonana le Mangwalo le dilo. Ba no phela ka tsela ye nngwe le ye nngwe ba nyakago. Ge ba na le modiša a leka go ba phošolla, ba mo raka. Ga ba na le selo go dira le yena ge a sa kgone go tliša Hollywood ka kerekeng; diphathi, diphathi tša panko, dilalelo tša sopo, le se sengwe le se sengwe gape; a lesa basadi ba dire ka tsela ye nngwe le ye nngwe ba nyakago, le go apara ka tsela ye nngwe le ye nngwe ba nyakago, maitshwarohlephi, eng kapa eng. Taletšo ya thobalano e ba mo—mo mosepelo wa sebjalebjale. Ke bogoboga.

⁹⁹ Jesu o boletše, go mosadi yola. O ka no ba o le wa bokwala ka mo o ka kgonago go ba, eupša o tla arabela bootswa ka letšatši la kahlolo, o apara diaparo tše. Jesu o rile, "Mang le mang a lebelelagoo mosadi, go mo kganyoga, o šetše a dirile bootswa le yena ka pelong ya gagwe." Gomme ga go kgathale gore o hloka molato bjang, modiradibe yola o tla arabela bootswa, gomme ke wena yo a bo tlišitšego. Lena Bakriste, a ga le lewe ke hlong? Le swanetše go dira bjalo ka barwedi ba Modimo.

¹⁰⁰ Gomme wena monna, maloko a kereke, matikone, ebile go badiredi, ba ba tla dumelelagoo basadibagatša ba lena go dira seo, leo swanetše go ba barwa ba Modimo. Seo ga se kwagale boka boitshwaro bja morwa wa Modimo ka tlhago ya Tate wa gagwe ka go yena. O boifa go bolela se sengwe gobane mokgatlo o tla go ntšhetša ntle. Yeo ke nnete.

¹⁰¹ Daniele o rerile ka pelong ya gagwe gore o be a sa ye go tšhilafatša peeletšo ya gagwe. O ile a rera, "Ga go kgathale gore lefase, kgoši o humile bjang, le bontši bjo a lekago go ntloša ka go dilo tša lefase, Ga ke ye go e dira. Ga ke ye go tšhilafatša peeletšo ya ka."

¹⁰² O lefase la Bokriste, o se ke wa tšhilafatša peeletšo ya gago ye o e dirilego ka Bophelong bjo Bosafelego. O tla e tšhilafatša.

¹⁰³ Daniele o rerile gore a ka se e dire. E lefile, ka go boloka bophelo bja gagwe ge a lahletšwe ka legolong la ditau. Peeletšo ya gagwe ka kgonthe e lefile.

¹⁰⁴ Bana ba Bahebere ba be ba ikemišeditše gore ba ka se rapele modingwana. Gomme e lefile, ka go boloka bophelo bja bona ka leubeng la mollo.

¹⁰⁵ Morago go tla Simone Petro, Mofarisei yo mokaone yo a rutilwego ke tatagwe, gore letšatši le tla tla leo—leo go tla tlago Mesia. Gohle go kgabola mabaka, batho ba Bajuda ba be ba e

lebeletše. Gomme ga go pelaelo gore tatagwe o be a mmoditše, “Morwa . . .” Ke—ke badile kanegelo ye nnyane nako ye nngwe, ka yona, e ka no ba e be e le boikgopolelo. Ga ke re e be e nepile.

¹⁰⁶ Eupša o rile, “Ke lebeletše bakeng sa nako ya go tla ga Mesia.” Gomme o rile, “Ke—ke—ke a tseba gore pele nako yeo e etla, go tla ba mehuta yohle ya diism, dilo tša maaka di kgatlampana. Eupša, morwa, bjalo ka Mohebere, re a rutwa, bjalo ka Bahebere, go dumela baprofeta ba rena, ka gore Lentšu la Morena le tla go baprofeta, gomme yena a nnoši. Morena o rile, ‘Ga Ke dire selo ntle le ge Ke e utolla go baprofeta ba Ka pele.’ Gomme Mesia yo, go ya ka Moshe, ‘Morena Modimo wa lena o tla tsoša moprefeta magareng ga lena, wa baena ba lena, wa go swana le nna.’ Gomme Mesia a ka se be morutiši. A ka se be kerekereleina. O tla ba moprefeta, gomme Lentšu la Morena le tla ba le Yena.”

Andrea o be a kwele Johane a bolela ka yo bjalo a ttago, “Mokolobetši.”

¹⁰⁷ Eupša ka gona, letšatši le lengwe, Simone ka boyena o sepeletše godimo ka Bogoneng bja Jesu yo wa Natsaretha. Gomme ka pela ge A lebeletše godimo ga gagwe, O rile, “Leina la gago ke Simone, gomme o morwa wa Jona.” O tšere pholisi thwi ka pela. O tsebile yoo e be e le Mesia. Leo e be e le Lengwalo le le hlatsetšwego la letšatši la gagwe, Mesia. Ba bangwe ba šitilwe bjang go le bona?

¹⁰⁸ Go be go le yo motee a eme, leina la Filipi, yo a ilego e ka ba dimaele tše lesometlhano go dikologa thaba, go moisa yo a bitšwago Nathaniele. Ba be ba bile le dithuto tša Beibele mmogo. Mohlomongwe poledišano ya bona e be e le se sengwe boka se, bjalo ka ge a mo hweditše ka tlase ga mohlare, a rapela. O rile, “Nathaniele.” Go le bjalo, ka go ba mokgomana yo a bego a latela Jesu; monna mang le mang yo a latelago Jesu e tla ba mokgomana. Kafao o mo hweditše a rapela; o—o letile lebakana. Eupša le ela hloko, ga se a ke a bolela le yena ka sekewa sa gagwe sa mohlware goba go ya pele. O ile thwi go mmaraka, “Etla, o bone Yo re mo hweditšego: Jesu wa Natsaretha, morwa wa Josefa.”

O rile, “Bjale, a go ka ba e ka ba eng ye botse e tšwago Natsaretha?”

A re, “Etla, o bone.”

¹⁰⁹ Yeo ke karabo ye kaonekaone motho mang kapa mang a ka kgonago go e fa yo mongwe. “Etla, hwetša wenamong. O se dule gae gomme wa swaswalatša. Etla, e nyakiše wenamong.”

¹¹⁰ Tseleng go dikologa, poledišano ya bona e ka no ba e be e le ka mokgwa wo. Mohlomongwe Nathaniele o rile, “O a tseba, re be re lebeletše Mesia, lebaka la mengwaga. Le a tseba, Filipi, ka fao re ithutilego se. Gobaneng, ke a dumela ge Mesia a etla, Modimo o tla goga ka Legodimong le go dira mekgoba

ye megolo go tla fase, matrapo thwi go (a rena) jarata ye kgolo ya tempele moo Kayafa moprista yo mogolo wa rena a lego, gomme O tla re, ‘Ke fa.’” Le a bona? Eupša yeo ga se tsela ye Lengwalo le rilego O tla tla.

¹¹¹ O tla tla feela ka tsela ye Lengwalo le boletšego. O be a etla ka go moprofeta feela boka Moshe a bile, monna wa setlwaedi, modiši wa dinku.

¹¹² Elang hloko, gomme ge a etla godimo ka Bogoneng bja Mesia, gomme O be a le mothalong goba go rapelela balwetši, goba e ka ba eng A bego a e dira. Re hwetša gore Mesia o lebelela godimo go yena, gomme o rile, “Bonang Moisraele yo ka go yena go sego bomenetša.”

¹¹³ Bjale le ka no nagana e be e le ka gobane o be a apere ka tsela yeo. Eupša, elelwang, batho bohle ba Bohlabela ba apere go swana, setše le ditedu, go ya pele. Le a elelwa, Jesu o sepetše le bona, le bona, tseleng go ya Emause, botelele letšatši lohle, ka morago ga tsogo ya Gagwe, gomme ebile ga se ba Mo tseba. O be a apere ka tsela ya go swana.

¹¹⁴ Kafao re hwetša gore ka go Bogona bjo bogolo bjo bja Gagwe, o rile, “Rabi.” Mohebere yo moswa yo mokaone yo o rile, “Rabi, O ntsebile neng? Ke neng O kilego wa ntseba, o ntseba go ba mo—mo Moisraele, le go botega, botsebalegi bjo ke nago nabjo? Wena ga se nke wa ke wa mpona pele. O ntsebile bjang?”

¹¹⁵ Gomme O rile, “Pele Filipi a go bitša, ge o be o le ka tlase ga mohlare, Ke go bone.”

¹¹⁶ O tšere pholisi. O wetše maotong a Gagwe ka mokgwa wo moisa yo mongwe yo moswa a dirilego, o rile, “Rabi, wena o Morwa wa Modimo. Wena o Kgoši ya Israele.” Leina la gagwe ke la go se hwe lehono.

¹¹⁷ Go na le mosadi yo monnyane, nka no bolela ka yena ka baka la bahumagadi ba ba emego kgauswi. Mohumagadi yo monnyane yo o be a sa swane le lena. O be a na le bo-bo bothata bja maitshwaro kgahlanong le yena, le kereke. Mohlomongwe segotlane tsoko se seswa se be se tlogeletšwe ntle mo mokgotheng, phošo. Mohlomongwe batswadi ba gagwe ga se ba mo hlokomela. O be a le seripa sa Mojuda le Montle; o be a le Mosamaria.

¹¹⁸ Elelwang, fao go na le merafo ye meraro feela ya batho, ge Lengwalo la rena e le therešo.

¹¹⁹ Gomme Modimo ntshwarele ebile go bolela “ge” Le rereša. Le a rereša. Ke Modimo Yenamong. “Mathomong go be go le Lentšu, gomme Lentšu le be le go Modimo, gomme Lentšu e be e le Modimo. Gomme Lentšu la dirwa nama gomme la dula magareng.” “Wa go swana maabane, lehono, le go ya go ile.”

Kafao mohumagadi yo moswa yo a tlogeletšwe ntle.

¹²⁰ Sa pele, nka no hhalosa batho ba Hama, Seme le batho ba Jafete. Bjale rena, Bantle, re be re le bahetene ka go wona matšatši, re be re rapela medingwana, eupša Mojuda le Montle ba be ba lebeletše Mesia. Gomme O tla feela go bao ba Mo lebeletšegeo.

¹²¹ Dinako tše dingwe lehono, re re re Mo lebeletše, le go bea dimilione le dibilione tša ditolara ka go dilo, le mafelo a go aga le dilo. Ke a makala. Gomme baromiwa ba ehwa ka tlala tšhemong, ke a ba tseba, ntle kua bošegong bjo ba rera, ba se na le para ya dieta godimo. Re bea dimilione le dimilione tša ditolara go ditšiebadimo, gomme gona, gobaneng, ditiro tša rena beng di ahlola bopaki bja rena.

¹²² Eupša mo mosadi yo moswa yo, bjalo ka ge re mo tseba, o be a le Mosamarria. Jesu o be a le tseleng ya Gagwe go ya Jeriko, e lego ka tlase ga Jerusalema. Eupša O ile go dikologa Samaria gomme a tla toropongkgolo ye e bitšwago Sikara, gomme a romela barutiwa ka gare go reka dijo, dijo. Gomme ge ba sa ile, mosadi yo moswa yo a tla godimo go ga meetse, gomme A—A re go yena, “Ntlišetše seno.”

¹²³ Gomme o lebeletše go dikologa, a Mmona e le Mojuda, o rile, “Ga se setlwaedi gore O tla nkgopela seo.” O rile, “O Mojuda.”

¹²⁴ O rile, “Eupša ge nkabe o tsebile Yo o bego o bolela le yena, o be o tla Nkgopela seno. Ke go fa meetse ga o tle mo go ga.”

¹²⁵ Kafao poledišano e ile pele, ka bodumedi, mafelelong O kgokagane le bophelo bja gagwe. O rile, “Sepela o bitše monnamogatša wa gago gomme le tle fa.”

O rile, “Ga ke ne monnamogatša.”

¹²⁶ O rile, “O boletše therešo. O bile le ba bahlano, gomme yo o dulago le yena bjale ga se monnamogatša wa gago.”

¹²⁷ Bjale matšatši a se makae pele ga fao, barutiši le borabi ba letšatši leo, banna ba ba bego ba swanetše go be ba tsebile bokaonana, ba rile, “Ke Beletsebubu. O dira seo ka moyo wo mobe.” Ba ile ba swanela go araba phuthego ya bona. Kafao ba dirile, ba rile, “Ke moyo wo mobe.”

¹²⁸ Gomme Jesu o rile, “Ke tla le lebalela bakeng sa seo,” poelano e be e se ya dirwa. “Eupša ge Moya wo Mokgethwa o etla go dira selo sa go swana, go bolela kgahlanong le Wona go ka se tsoge go lebaletše,” gomme re a tseba e diregile ge Tito, ka morago ga ge ba ganne Moya wo Mokgethwa, Tito o tšhumile tempele gomme a šwalalanya Bajuda go ya gohle lefaseng. Gomme bjale ba no kgobokana gape, ke go phethagatša Lengwalo.

Bjale, hlokamelang, bjale mosadi yo moswa yo.

¹²⁹ Ge, Bajuda bale ba bone seo se dirwa, gomme ba Se bitša, “moya wo mobe, moyo wa ditšila,” Beibele e rile, “go bitša Moya wa Modimo, go dira mošomo, Moya wa ditšila, diabolo,” boka mmolelelamahlatse goba motho tsoko yo mobe.

¹³⁰ Gomme ka gona, ka pela, mosadi yo o tsebile go fapano. Ge A rile, “Sepela o bitše monnamogat wa gago.”

O rile, “Ga ke naye.”

¹³¹ O rile, “O boletše therešo, gobane o na le ba bahlano, gomme yo o dulago le yena, ga se monna wa gago.”

¹³² Lebelelang se. Ka pela o rile, “Mohlomphegi, ke a bona gore O moprofeta.” Elelwang, ba be ba se ne baprofeta lebaka la e ka ba mengwaga ye makgolotlhano. Maleaki o be a le moprofeta wa mafelelo wa Mohebere. “Rena, re a tseba gore Mesia o etla, gomme bjo e tla ba boitsebišo bja Mesia. Re a tseba, ge A etla, se ke se A tla se dirago.”

Jesu o rile, “Ke nna Yena yo a bolelago le wena.”

¹³³ Gomme o tšere pholisi. Uh-huh. Gomme o ile ka toropongkgolo, go phatlalatša Ditaba tše dibotse, gore o be a hweditše Mesia. O be a na le Bophelo bjo Bosafelego ka baka la gore o be a dumetše go Yena. O tsebile bjang? O bone boitsebišo bja Lengwalo bo bonagatšwa ka Yena.

¹³⁴ “Re tseba seo, ge Mesia a etla. Mengwaga ye makgolonne ga se ra ke ra ba le moprofeta, gomme, ge A etla, yoo e tla ba monna yo a latelago golefelotiragalo. Bjale ge A etla, re tla Mo tseba, gomme O tla dira selo sela sa go swana.”

¹³⁵ O rile, “Ke nna Yena.” O tšere pholisi. O be a ne kgahlego ka go yona.

¹³⁶ Nikodemo. Dinakwana di se kae, go tswaleleng bjale. Nikodemo, rabi, monna wa e ka ba mengwaga ye masomeseswai bokgale. O be a kgotšwe gore go be go le se sengwe ka Jesu seo se bego se fapano go feta monna yo mongwe, kafao o nyakile pholisi. Kafao o tlide bošego, bakeng sa pholisi, gomme o hweditše panka e butšwe bakeng sa kgwebo. Uh-huh.

¹³⁷ Ka mehla e bulegile. E bulegile moletlwaneng. E bulegile ntle kua mokgotheng. E bulegile kae kapa kae fao go na lego yo mongwe yo a loketšego go dira kgwebo, pholisi ye le yo motee yo a e swerego.

O hweditše panka e bulegile. O tšere pholisi.

¹³⁸ Bjale re a tseba, ka go Luka 24:49, morago ga ge Jesu a kgethile barutiwa ba Gagwe, ba be ba le baswari ba pholisi ya Bophelo bjo Bosafelego. Kafao bjale, le a tseba, ka go pholisi ya mehleng ya inšorense, ka mehla ba lefa mašokotšo. Kafao ba be ba šetše ba amogetšwe le go kgethwa ke Jesu, kafao ba ile godimo Jerusalema, ba letile go fihla Letšatši la Pentecost, go hwetša mašokotšo a bona. Gomme e lefile, ka kolobetšo ya Moya wo Mokgethwa, le maatla go bonagatša Jesu Kriste.

¹³⁹ Methodist, Baptist, Presbyterian, Orthodox, le mang le lego, ba ba teleimago go ba Bakriste, gabaneng le sa dire sa go swana? O dumela go Jesu Kriste le go ba moleloko wa kereke, gabaneng

le sa rotogele go Pentecost, hwetšang mašokotšo a lena, maatla a Moya wo Mokgethwa! Bona baswari ba pholisi ba ntšhitše. O ka kgona, le wena, ge o e dumela gomme ka kgonthe o e dumela.

¹⁴⁰ Petro a bolela le bona, o rile, “Tshepišo ke ya lena le bana ba lena, go bona bao ba lego kua kgole, le ka bontši bjo Morena Modimo wa rena a tla ba bitšago.” Ba nyakile go tseba ba dire eng. O rile, “Sokologang, yo mongwe le yo mongwe wa lena, gomme le kolobetšweng Leineng la Jesu Kriste bakeng sa tebalelo ya dibe tša lena, gomme le tla amogela neo ya Moya wo Mokgethwa.” E be e le tshepišo.

¹⁴¹ Ka fao ge o no ba moipolloedi, bošegong bjo, gomme o se wa ke wa goga mašokotšo a gago, gobaneng o sa tliše pholisi ya gago, bošegong bjo, a nke ke bolele le wena nakwana ye nnyane. Khunama le nna metsotso e se mekae gomme le hwetše ge eba ga go bjalo. Hlokofalang ka yona. E tla lefa gonabjale, ge ka kgonthe o swere pholisi. O tla lemoga pholisi, tumelo ya gago, ge o re e ka go Modimo. Ge e le ka go Modimo le ka go Lentšu la Gagwe, gomme e segó ka go kereke tsoko goba thutotumelo ya kerekeliina, eupša e no dumela go Jesu Kriste, e tla lefa. O tseba pholisi ya Gagwe Mong.

¹⁴² Go tliša moanegwa yo mongwe ka gare, feela dinakwana di se kae. Go be go le Mohebere yo mongwe wa mohumi yo a kopanego le Jesu letšatši le lengwe ka morago ga lehu la Gagwe, poloko, le tsogo.

¹⁴³ Ge go ka ba Mohebere fa, bošegong bjo, goba e ka ba mang o lego, Yena go bapolweng ga se maitshwarelelo a a itšego eupša se o ka kopanago le Yena thwi mo, go no swana le—le mmuši yo moswa wa mohumi a kopana le Yena. Ge o nyaka pholisi, O mo go dira kgwebo.

¹⁴⁴ Go be go le monna ka leina la Saulo, gomme o be a rutilwe ka go dithuto tšohle tše kgolo le metlwae ya batho ba gagwe. Gamaliele e be e le morutiši wa gagwe, yo mongwe wa barutiši ba bakaonekaone ba Bahebере ba nako. Gomme Saulo o be a fišega ka se, go fihla a kgatlile Stefano ka maswika, goba a hlatsela Stefano, goba a e dumelela. O swere dijase tša bale, ge a be a dumelela, a na le maatlataolo go tšwa go moprista yo mogolo go lahlela ka moka batho, ba pholisi yela, ka kgolegong, gobane o be a boditšwe ke bagolo ba gagwe, gore, “Monna yo o be a se moprofeta. Go be go se selo go Monna yo eupša go se tsepame.” Gomme o be a swere mangwalo ka dipotleng tša gagwe, a eya tlase, gobane o kwele go be go ne ba bangwe tlase ka Damaseko, ba swerego pholisi yela. Gomme ba be ba goga mašokotša go yona, gomme ka kgonthe ba be ba dira dilo.

¹⁴⁵ Gomme moprista yo mogolo o mmoditše, “Saulo, o monna wa phišegelo. Tšeа maatlataolo a, go tloga go nna, eya tlase fale gomme o sware yo mongwe le yo mongwe wa bona, gobane ga se bona selo eupša ba go se tsepame, ga go selo go bona. Eya tlase

gomme o ba tleme, gomme o ba lahlele ka kgolegong. O swanetše go ba bolaya, go ba bolaya, go lokile. Eya o ba tsee!”

¹⁴⁶ Saulo o rile, “Tlhompho ya gago, mohlomphegi, tate yo mokgethwa, ke tla ya.” O ile tlase.

¹⁴⁷ Tseleng ya gagwe go theoga, o be a eya e ka ba ka iri ya lesometee mosegaré, a batamela toropokgolo. Ka pelapela, go tswa magodimong go tlile Pilara ya Mollo, ya mo rathela fase. Gomme o phagametše godimo go lebelela, gomme fao go be go le Pilara yela ya Mollo pele ga gagwe.

¹⁴⁸ Bjale go netefatša seo go lena. O be a le Mohebere, gomme o be a ka se tsoge a rapela e ka ba eng goba go bitsa e ka ba eng Morena, ntle le ge a tsebile e be e le Morena. Gomme o tsebile, bjalo ka morutiši ka tlase ga Gamaliele, gore Morongwa wa Morena, yo a bego a le Logos yo a tšwelego go Modimo, e bego e le Kriste yo a bego a ba eteletše pele go kgabola lešoka, o be a le ka sebopego sa Seetša, Pilara ya Mollo. Gomme ge Se mo rathetše fase, gomme o lebeletše godimo gomme o Se bone fale, o rile, “Morena.” Bjale, a ka be a se a ke a bitsa selo eupša Seo, Morena. Eupša, ka go ba Mohebere, o tsebile gore Yoo e be e le Jehofa. Ke ka lebaka leo a bileygo le kutollo, a ka bolela gore Jesu wa Testamente ye Mpsha e be e le Jehofa wa ye Tala. Yeo e be e le kutollo ya gagwe, gobane o be a bone Jehofa. Gomme o rile, “Morena, Wena o Mang?”

¹⁴⁹ O rile, “Ke nna Jesu, gomme go thata go wena go raga kgahlanong le seotledi.” Gomme o tsere pholisi.

¹⁵⁰ Bapetša monna ba babedi mmogo. Yo motee wa go huma Mohebere yo a bego a nyaka go swarelala go ditšo tša bona; yo mongwe yo a bego a kgodišegile. Yo mongwe wa bona o Mmone bjalo ka motho, gore Modimo o dirilwe nama gore a hwe le go tloša sebe.

¹⁵¹ Madi a dikwana le dilo, bophelo bo be bo le ka kua, bo be bo sa kgone go tla godimo ga modumedi, gobane ke bophelo bja kwana, ga bo ne soulo ka go bjona, bophelo bja phoofolo. Eupša yo e be e le Modimo ka Boyena, gomme, ka gona re tla go tswalwa ke Moya woo, re barwa le barwedi ba Modimo, Bophelo bjo bo bego bo le godimo ga Sehlabelo sa rena.

Bapetša banna ba babedi mmogo.

¹⁵² O Se bone se hlatselwa, gore Modimo o be a le ka go Kriste. Pilara ya Mollo ya go swana ye e tlišitšego batho ba Gagwe go kgabola lešoka, le go ba tliša fale, go ba fepa letšatši lohle. Eelwang, ge Jesu a be a le lefaseng, O rile, “Ke tswa go Modimo, gomme Ke ya go Modimo.” O be a le Pilara ya Mollo ye e tšerego bana go kgabola lešoka.

¹⁵³ Beibele e boletše, gore, “Moshe o hweditše mahumo a Kriste e le mahumo a magolwane go feta ao a Egepeta.” O tlogetše Egepeta, go latela Kriste.

¹⁵⁴ Ge A be a le mo, Pilara yela ya Mollo e be e emetšwe ka go Yena, Modimo. O rile, “Ge Ke sa dire mediro ya Tate wa Ka, gona se Ntumeleng. Mediro e le botša se ke swanetšego go se dira. Ge Ke sa dire seo, gona le se e dumele. Eupša ge le sa kgone go Ntumela . . .”

Ba rile, “Wena o—Wena o motho o itira Modimo Wenamong.”

¹⁵⁵ O rile, “Ge le sa kgone go Ntumela, bjalo ka Motho, dumelang mediro. E paka ka Nna.” Le a bona?

¹⁵⁶ Bjale, ge A be a hwile, a bolokilwe, a tsogile, a rotogile, fa re Mo hwetša gape ka go Pilara yela ya Mollo. O be a etšwa go Modimo, gomme o ile go Modimo.

¹⁵⁷ O sa le Yena wa go swana, Yena wa go swana bjale. Hlokamelang, kgonthe, Yena wa go swana yoo A bilego.

¹⁵⁸ Gomme ge Paulo, goba Saulo nako yeo, a lemogile gore Modimo Jehofa, Pilara ya Mollo ya Testamente ya Kgale, o be a ipiditše Yenamong Jesu, o tšere pholisi ya gagwe. O be a le komana bakeng sa yona nako yeo.

¹⁵⁹ A sephetho sa phošo go mmuši yo moswa yola! A . . . O swanetše go ba bjang . . . Eng, o kgonne bjang go e dira? [Ga go selo go theipi—Mor.]

¹⁶⁰ O tla fa eng go rekolla soulo ya gago? Ka morago ga meago yohle ya lena, gomme le—le e tlogela go meloko ya lena go lwa gape, le se sengwe le se sengwe, go reng ka soulo yela le mo o yago go ba gona? Elelwang, o tla ba felotsoko, mengwaga ye dikete go tloga bosegong bjo. Ye e ka no ba nako go wena go dira sephetho sa gago.

¹⁶¹ Elang hloko phošo ye kgwe—. . . A wa—a wa go šokiša rakgwebo a bego a le yena, go leka go swarelala go setšo, ge e netefaditše go yena le go hlatselwa gore Mo go be go le Bophelo bjo Bosafelego, gomme o hlatsetše sa go swana ka go botšiša Jesu ka yona.

¹⁶² Paulo o e amogetše. Re tseba ka fao a tšwetšego ntle. Go swana le batho ba letšatši, ba rata kgopolu ya go tsebalega, le tumišo ya motho sebakeng sa tlhompho ya Modimo. Paulo o be a sa tshwenyege ka tumišo ya motho. O be a nyaka tlhompho ya Modimo.

¹⁶³ A re late leng mošemane yo moswa yo feela nakwana pele re tswalela. A re mo late leng. Re hwetša lefelo la go latela, gore, moisa yo moswa yo, o tseba se se diregilego go yena? Ga se a ke a ba mokgopedi, go direng se. Ga se a ke a ba mokgopedi mokgotheng. O ile a gola ka dithoto. O ile a gana sebakabotse.

¹⁶⁴ Makga a mantši, batho lehono ba tla sega le go dira metlae ka Moya wo Mokgethwa, morago ba ya pele le go gola kgwebong ya bona. Le a tseba, swarelang tlhagišo ye . . . Eupša ge ba sega, ba re, “Gobaneng, lebelela, nna! Ge fao go le eng kapa eng go

Lona, le a bona, ka baka la eng, se ka be se diregile go nna, selo se sengwe se diregile go nna.”

¹⁶⁵ Le a tseba, go na se—se—se seema, gore, “Mašilo ba tla sepela ka dieta tša go tsatsampela moo Barongwa ba boifago go gata.”

¹⁶⁶ Mmuši yo moswa yo ka kgonagalo o dirile seo. Le a bona? O dirile pho—pho phošo ya go šiiša, gomme re hwetša gore ga se ya ke ya šitiša kgwebo ya gagwe. O ile a gola. O ile a ba wa go tsebalega kudu, a hwetša dithoto tše ntši. Re hwetša, ka morago ga lebakana, gore o be a na le se segolo kudu go fihla le bile a swanetše go aga matlolo a maswa go bea dilo tša gagwe ka gare.

¹⁶⁷ Gomme ka baka la gore kereke e ganne Moya wo Mokgethwa, ka mo matšatšing a a mafelelo, e gotše. Gomme bjale le ya ka go Khansele ya Mohlakanelwa, feela tlwa se Beibele e rilego le tla se dira. Bjale ka kgonthe le Laodikia, “le humile le go oketšega ka dithoto,” feela tlwa boka lesogana lela le bile.

¹⁶⁸ O be a le sekai sa kereke, go gana. Paulo o be a le sekai sa yo a amogelago. Bobedi bja bona ba bile le sebakabotse, bjalo ka ge le na le sona bošegong bjo, gomme ke naso.

¹⁶⁹ O godile ka dithoto. Ka fao le kereke, Lebaka la Laodikia, e godile ka dithoto. Gomme elelwang, o bile yo mogolo kudu, go fihla a eba wa go tsebalega kudu, go fihla ebole le bakgoma, batho ba bagolo, ba thoma go tla. Gomme o beile moletlwana wo mogolo, nako ye nngwe.

¹⁷⁰ Gomme fao go be go le moswari wa pholisi ya Bophelo bjo Bosafelego ka bazaar ya gagwe, gomme re hwetša gore o be a robetše fase mojako. Oo, a ka no swiela mafofora go tloga go yena. O bile le sebakabotse gape, hlatse, Latsaro a paka go yena. Eupša o nno swiela go tloša mafofora, “Oo, gabotse, ke tla leka se, go tsea kotara ye, goba e ka ba eng,” le a tseba. Seo e ka ba mokgwatebelelo wa 1964. “Oo, ke tla thuša gannyane. Seo se lokile, nno mo lesa a ye, le a bona.”

¹⁷¹ Eupša o swere pholisi. “Bahumanegi moyeng,” Mateo 5 e re botša gore ke yena, “sa bona ke Mmušo wa Legodimo.”

¹⁷² O ile pele a gola ka dithoto, le go ba yo mogolwane le go tsebalega kudu, le monna yo mogolo, eupša tefo ya gagwe mafelelong ya tla. Mafelelong e tlide. Mo lefaseng o bile le tefo ye kgolo. O be a na le tirelo ye kgolo ya poloko, ntle le pelaelo. Moreri yo mogolo wa kerekeleina o tlide, go molaleng o boletše mantšu a magolo godimo ga gagwe. Ba ka no ba ba theošitše folaga seripa. Borakgwebo ba bakaone ba mo rwaletše go poloko ya gagwe. Eupša Beibele e rile, “ka heleng,” tefelo ya gagwe ya tla bakeng sa go gana pholisi ya Bophelo bjo Bosafelego.

¹⁷³ “Ka heleng o phagamišeditše mahlo a gagwe godimo, a le tlaišegong.” Gomme o lebeletše kgole go kgabaganya legaga le legolo, leo Jesu a rilego ga go motho a kilego a le tshela goba a ka tsogego a dira, gomme o hweditše moswari wa pholisi ya Bophelo

bjo Bosafelego, a homotšwa, ka lehlakoreng le lengwe. Bobedi bja bona. Yo motee o E amogetše. Bobedi ba bile le tefelo ya bona. Moswiela marathana o bile le tefelo. Gomme bjale monna wa mohumi o ba mokgopedi, "A nke moswari wa pholisi a bowe morago le go kgwatha dipounama tša ka ka me—me meetse a mannyane, ka gore dikgabo tše di a ntlhoriša."

¹⁷⁴ O se ke wa dira phošo ye e swanago, rakgwebo. O wa go hwa go no swana le ka fao ba bego ba le ka gona. O swanetše go tše sephetho. Dira peeletšo ya gago bjale. E dire kgonthe. "Dira kgetho ya gago, pitšo kgonthe." Tšeа ye nngwe ya dipholisi.

¹⁷⁵ Lebelelang feela—feela nakwana goba tše pedi gape, ge le ka kgona. Ge Moshe, yo a go tlogela, e le kgoši ya Egepeta, Farao, a bona go gobošwa ga Kriste. Farao o ile a lebelela ntle godimo ga bona batho bjalo ka sehlopha sa badubaleraga, eupša Moshe a lebelela godimo ga bona bjalo ka batho le tshepišo.

O lebelela bjang go bona, batho ba Modimo?

¹⁷⁶ Moshe o bile le tefelo. Šetšang barwalalepokisi ba gagwe. Beibele e rile ba be ba le "Barongwa." Gobaneng? Ga go yo mongwe gape a bego a ka kgona go mo iša moo a bego a eya. Ba be ba le barwalalepokisi ba gagwe.

¹⁷⁷ Go bile le Eliya mo nakong yeo basadi bohole ba ripago moriri wa bona, boka Mdi. Kennedy le bona ba dira lehono. Ba pentile difahlego tša bona, Isebele. Kgoši le batho bohole ba ile bolefase; kereke e dirile, le yona. Gomme Modimo o rometše moprefeta ka ka gare ka leina la Eliya, go ahlola selo seo. Ka morago ga ge a bile mokgalabje le go lapa, o be a loketše go ya Gae, ebile o be a se a swanela go hwa. Tefelo ya gagwe e a tla, le yena, Modimo o nno mo romela koloi tlase le dipere tše dingwe, gomme a mo rwalela godimo ka Magodimong.

¹⁷⁸ Stefano, yo a emego ka Sanhedrin, o boletše ntle go bona gomme o rile, "Oo, lena ba melalamethata, mašoboro ka pelong le ditsebeng, le gana pholisi, ka mehla le phegiša Moya wo Mokgethwa. Boka botataweno ba dirile, le dira bjalo." Mo lehung la gagwe, o bile le tefelo. O lebeletše godimo gomme o bone Magodimo a bulegile, Jesu a eme ka lehlakoreng le letona.

¹⁷⁹ Moody, matšatši a mafelelo, e ka ba mengwaga ye lekgolo ya go feta, moruladieta yo monnyane wa Chicago, o be a sa kgone go ngwala leina la gagwe. Pampiri e rometše go Moody, nako ye nngwe. Bodiredi bja gagwe bo be bo itlhaotše kudu, ba be ba nyaka go mmona a beilwe ka lephepheng se se bo dirilego; go be go le eng ka Moody, ke mohuta mang wa moreri a swanetše go ba yena, le moreri wa maatlatshepedišo. Kafao ba rometše poledišanonyakišio, go ngwala ka go sengwalwa sa bona. Gomme Moody ebile ga se a kgone go e bala morago ga ge ba e ngwadile, kafao molaodi wa gagwe o ile a swanela go mmalela yona. Gomme o rile . . .

¹⁸⁰ Tsela ye borulaganyi bo balegago še. E rile, “Gobaneng e ka ba mang a ka yago go kwa Dwight Moody a rera, ke go feta nka kgonago go bolela.” O rile, “Selo sa pele, ke monna wa sekobokobo nkilego ka mmona le ditedu di lekeletše fase.” Gomme o rile, “Ke yo—ke yo mogolo go dikologa go no swana le ge a le yo motelele.” Gomme o rile, “Ge a leka go rera, ga a kgone go bala. Gomme o a tswinya ge a rera, o bolela ka nko ya gagwe, le mohлага.”

¹⁸¹ Ge a feditše, Mna. Moody o ile a no šišinya magetla a gagwe, gomme a re, “Nnete aowa. Ba tlie go bona Kriste.” Kafao seo e bile sona. Ga go kgathale se baswaswalatši ba bilego, o swere pholisi.

¹⁸² Gomme ge a be a ehwa, gomme ngaka o rile, “Leo ke lehu le le rathilego, Mna. Moody.”

¹⁸³ O phagametše godimo, o rile, “O bitša se lehu? Le ke letšatši la ka la go hlomamišwa.” Le a bona? O swere pholisi.

¹⁸⁴ Mogwera wa ka wa go loka, Paul Rader. Ge ke be ke sa le mošemanе yo monnyane, ke be—ke be ke hlomamištwe ka kerekeng ya Missionary Baptist, gomme Paul Rader o be a le Missionary Baptist le yena, kafao, Fort Wayne, ge ke be ke tlwaetše go ya go mo kwa a rera. Moragwana, o ile godimo fa ka go Lebopo la Bodikela gomme a hwetša bothata bjo bontši kudu, gomme mafelelong ke bothata go fihla a babja, mafelelong a hlahliwa go ya go kankere, gomme o be a ehwa. Yena le Luke ba be ba ile mmogo bophelo bjohle bja bona, ba kgomagane mmogo bjalo ka morwa wa ka le nna.

¹⁸⁵ Kafao ge Paul a be a ehwa, Moody Bible Institute e rometše khwathete, gomme ba be ba eme fale. Paulo o bile le tshegišo. Gomme o be a . . . Ye nnyane ye maatla . . . Moody Bible Institute ye nnyane, le khwaere ye, di be di rometše tlase kua, goba khwathete, gomme ba be ba opela, “*Kgauswana, Modimo wa Ka, Go Wena.*”

¹⁸⁶ Paulo o retologile godimo gomme a fošetša lephephe go tloga go yena. O rile, “Ke mang a hwago, nna goba lena?” Le a bona? O rile, “Tsošang yona meriti, gomme le nkopelele dipina tše botse tša Ebangedi.” Gomme ba thoma go opela:

Tlase sefapanong mo Mophološi wa ka a
hwilego,
Tlase mo ke llelago tlhwekišo go tšwa sebeng;
Fale Madi a tloditšwe pelong ya ka;
Letago go Leina la Gagwe!

¹⁸⁷ Paulo o rile, “Ngwanešu wa ka o kae, Luke?” Luke o be a le ka kamoreng ye e latelago. O be a sa nyake go bona ngwanabo a ehwa. O rile, “Mmotšeng a tle mo.”

¹⁸⁸ Kafao Luke o sepeletše ka gare. Bontši bja lena le mo tsebile, moisa yo mogolo wa senatla. O sepeletše ka gare. Paul

o obeeditše seatla sa gagwe ntle, a robetše malaong, gomme o tšere Luke ka seatla gomme o lebeletše godimo ka sefahlegong sa gagwe, o rile, “Luke, re tlide ditsela tše telele mmogo. Eupša nagana ka yona, Luke; mo metsotsong ye mehlano go tloga bjale ke tla be ke eme ka Bogoneng bja Jesu Kriste, ke apere toko ya Gagwe.” A swere diatla tša ngwanabo, pholisi ya gagwe e lefile.

¹⁸⁹ Ngaka Bosworth, yo a bego a le mo nako ya mafelelo, le nna, kgauswi le nako ya mafelelo, mengwaga ye masomeseswai nne bogolo, go no bowa go tšwa Afrika. Ke bile le pitšo go “tla Miami.” Ke kgeitše dithaere go tloga go koloi ya ka, go nyakile, go fihla kua. O rile, “O be a ehwa.” Ke kitimetše go yena. Ke tsebile o be a le moswari wa pholisi. Ke ile tlase.

¹⁹⁰ Ke ile ka kamoreng kua. Moisa yo monnyane wa hlogo ya lefatla ka matsogo a gagwe godimo, matsogo a gagwe a mannyane a go ota. Ke kitimetše go yena gomme ka wa ka sefahlego sa ka, gomme ka lla, “Tate wa ka, tate wa ka, dikoloi tša Israele le banna ba dipere ba tšona!” O beile diatla tša gagwe godimo ga ka gomme o ntšhegofaditše.

Ke rile, “Ngwanešu Bosworth, a nka go rapelela?”

O rile, “Aowa.” O rile, “Ga ke babje.”

Ke rile, “Bothata ke eng, Ngwanešu Bosworth?”

O rile, “Ke no ya Gae.”

¹⁹¹ Ke rile, “Ke tsebile seo.” Gomme ke rile, “ke nyaka go go botšiša se sengwe, Ngwanešu Bosworth.” Ke rile, “Nako ye kgolokgolo ya bophelo bja gago le bodiredi bja gago e bile neng? O be o direla Modimo pele ke tswalwa. Re be re le mabaleng a boromiwa mmogo. Re be re le ka madimong, ka moyeng le godimo ga lewatle. O eme hleng le nna ge ke bone bodiabolo ka lehlakoreng le lengwe le le lengwe, le dingakabaloi. Gomme e be e le thakgalo ye kgolo ge re bone Modimo a ba golofatša ba eme fale. Ke eng thakgalo ye kgolokgolo ya bophelo bja gago?”

¹⁹² O rile, “Thwi bjale.” O be a lokišetše go amogela mašeleng ka go pholisi ya gagwe. O rile, “Tšohle ke di pheletšego, Ngwanešu Branham, e bile Jesu Kriste, gomme motsotsso e ka ba ofe O tla sepelela ka lebating go nkiša Gae.”

¹⁹³ Ee, bale e be e le baswari ba pholisi bao ba filego se sengwe le se sengwe ba bileygo le sona, le go se beeletše ka go Pheta ya theko ye kgolo. A o ka se beeletše, bosegong bjo, le wena, ge re inamiša dihlogo tša rena?

¹⁹⁴ Ga ke kgone go bona go kgabaganya batheeletši. Ga ke tsebe ke eng... ke ba bakae, goba ba ba lebeletšego ka gare, ka go thelebišene ya go dikologa ya go dikologa bosegong bjo. Ke ya go go kgopela, mogwera, a nke le e se be mantšu a go tsekella. O wa go hwa. O swanetše go hwa. O a e tseba. Gomme e ka no ba pele ga moso nako ya gago e tla tla. Ga ke... motho kudu go go phegelela; gomme, ka gore Jesu o rile, “Ka moka ba Tate

a Mphilego bona ba tla tla.” Ge go na le kamora ka pelong ya pholisi yeo, bosegong bjo, a o ka se E amogele? Pholisi yeo ke Kriste, pholisi ya neo ya lerato la Modimo go wena, Lentšu la Gagwe go ba go phela ka pelong ya gago, go go dira karolo ya Gagwe. Yena ke Lentšu. Mo amogele ka bophelong bja gago. A o ka se e dire, le go dira peeletšo ye kgolo ye?

¹⁹⁵ Bokgole bjo ke kgonago go bona, ga ke kgone go bona eupša e ka ba dikgato tše lesome go tloga go nna, goba lesometlhano. Ke ya go le kgopela go phagamiša diatla tša lena ge le ka rata go amogela e tee dipholisi tša Bophelo bjo Bosafelego. O re, “Ke a e nyaka, Ngwanešu Branham. E no nkgopola ka dithapeleng tša gago. Ga o bone seatla sa ka, eupša Modimo o a dira.”

¹⁹⁶ Tate wa rena wa Magodimong, ye bonolo ye, ya go befa, efela kanegelo ya therešo ya bophelo. Ke e boletše ka tsela ye, Morena, gobane batho bale, batho ba kgwebo, ba tla e kwešiša go fetiša ka tsela ya go ba se sengwe se emetšwego mo lefaseng. Ke ka lebaka leo ke e bitšago pholisi. Ntshwareleng ge eba ke be ke le phošo go e bitša yeo. Ka gore, bjale re ka go na—na nakwana ye kgethwa ka kgontha, moo go se nago pelaelo gore go na le ba bantši ba naganago ka tlhokofalo bjale, go tseba gore le bona ba swanetše go ba le tefelo go e ka ba eng ba nago fa, gomme ba bona se go se rago go gana.

¹⁹⁷ Bjale, lesogana lela, bjalo ka ge ke tseba, mohlomongwe go tsebalega magareng ga batho, o dutše ka kerekeng, o bolokile melao, ga se a dira bootswa, goba go utswa, goba go dira dilo tše, eupša ka pelong ya gagwe mong o tsebile gore o be a se ne Bophelo bjo Bosafelego. Dira bao, Morena, ba ba lekago go kopana le Wena, bakeng sa Bophelo bjo Bosafelego, ka feela mereo yeo ya maitshwaro, a nke bosegong bjo ba amogele taletšo, gomme ba no dula maotong a bona, le go re, “Morena, ke tla dira e ka ba eng yeo O nkgopetšego go dira.” E fe, Morena.

¹⁹⁸ Bohle ke ba Gago bjale. Ke neela se sengwe le se sengwe go Wena. Gomme ge peu e wetše kae kapa kae, Morena, godimo ga mobu ofe kapa ofe, peu e ka ba efe ye e kgethetšwego pele, lebaka la mengwaga ye mentši e swerwe ke tlala le lenyora, e ka no ba e wetše godimo ga ye nngwe felotsoko bosegong bjo. A nke ba amogele Bophelo, Tate, ka gore ke e kgopela Leineng la Jesu Kriste.

¹⁹⁹ Gomme ka dihlogo tša rena di inamišitšwe kgafetšakgafetša, ke ya go kgopela Ngwanešu Pearry, ge a ka rata, go tla mo le go šala, go tšea tirelo ye e šetšego.



Dipeleletsō NST64-0314
(The Investments)

Molaetša wo ka Ngwanešu William Marrion Branham, setlogong o abilwe ka Seisimane ka Mokibelo mantšiboa, Matšhe 14, 1964, go moletlwana wa Businessmen Appreciation ka Beaumont Hotel ka Beaumont, Texas, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye ya North Sotho phetolelo e ngwadilwe gomme ya phatlalatšwa ke Voice Of God Recordings.

NORTH SOTHO

©2022 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriſte. Puku ye e ka se kgone go rekišwa, go tſweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditſhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org